

Xojon carta-la San Pablo xi kiskiì-la xita naxandá-la Cristo xi títsajna Colosas

Kó tsò Pablo nga síhixat'aà jñà xita
naxandá-la Cristo xi títsajna Colosas

1 ¹⁻² Jñò xi xita naxandá-la Cristo 'mì-nò xi ján títsajnaà naxandá Colosas nga kixi onguít'aà-là Cristo, 'an xi Pablo 'mì-na ko 'ndsè Timoteo títsanìhixot'aà-nòjen nga 'an tsibíxáya-na Jesucristo nga k'oas'ín kjòmejèn-la Nainá. Nainá xi Na'èn-ná, ko jè Jesucristo xi otíxoma-ná kàtatsjá-nò kjondaà ko kjoa'nchán ya jjiin inima-nò.

Kó tsò Pablo nga tsjá-la kjondaà Nainá

³ Kjit'aà naxrjein k'e nga nokjoàt'aà-lajen Nainá xi it'aà tsajòn, 'biì-lajen kjondaà Nainá xi Na'èn-la Jesucristo jè xi otíxoma-ná. ⁴ Koií kjoa-la ngajen jyeé k'oas'ín kina'yà-jen nga ndaà mokjeiín-nò it'aà ts'e Cristo Jesús. Tíkoa matsjacha ngats'iì xita-la Nainá. ⁵ Koií k'oas'ín 'nè-nò nga títsachiñá-là nga tjoé-nò kjondaà xi tíjnatjò-la Nainá ján ngajmii; koni s'ín kjòchiya-nò k'e nga kina'yà 'én ndaà-la Nainá xi kjoa ts'e Cristo xi nguì kjoakixi. ⁶ Tjè-ne jè 'én ndaà-la Nainá xi kjoa ts'e Cristo xi jye k'oas'ín kina'yà, 'nó tìnokjoáya nga tíjtsa isò'nde ko 'nó kjìn xita nchifatjìya-la kjohítsjeèn-la koni s'ín komàt'ioòn jñò k'e nga jahatjìya-la kjohítsjeèn-nò nga jahas'en-jiin-nò kjondaà-la Nainá xi nguì kjoakixi. ⁷ K'oaá s'ín tsakóya-nò Epafras jè xita xi matsjacha-jen nga taña nìxákjoè-jen it'aà ts'e Nainá; nga jè Epafras, jngodè chi'nda-la Cristo xi kixi síxá xi it'aà tsajòn. ⁸ Jyeé tsibénojímí-najen nga

jè Inimá Tsjeè-la Nainá síkítsjeèn-nò nga ndaà matsjacha xita.

⁹K'e nga kina'yà-jen, mikii nijchàajin-jen nga bìtsi'batji-nòjen. K'oaá s'ín nijét'aà-lajen Nainá nga ngui ndaà kàtasíchiya-nò koni s'ín mejèn-la jè; jè Inimá Tsjeè-la kàtatsjá-nò k'johítsjeèn kò k'joachjine. ¹⁰T'ikoaá nijét'aà-lajen nga k'oas'ín tijchá yijo-nò koni s'ín ok'in-la nga s'ijchá yijo-la xi xita-la Nainá, nga kjit'aà nachrjein k'oas'ín t'een koni s'ín mejèn-la, nga k'oas'ín t'een ngats'iì k'joa xi ndaà tjín kò nga ìsa ndaà jchaxkon yá-né xi Nainá. ¹¹K'oaá t'is'ín nijét'aà-lajen Nainá nga tse nga'ño kàtatsjá-nò koni s'ín tjín nga'ño-la xi mikii fehet'aà, mé-ne nga kixi k'itsajna-nò nita mé k'joa xi sakò-nò, t'ikoa s'e-nò k'joatsejta kò kjotsja. ¹²T'ji-là kjondaà Nà'è-ná nga jè kisikítsajnandaà-nò nga t'ikoa t'joé-nò kjotjò xi jè jye tjíndaà-la ján ngajmii ñánda iseèn choòn nga tsjá-la ngats'iì xita-la xi ya chja-ne naxandá-la Nainá. ¹³Nainá kisikítsajnandeí-ná it'aà ts'e nga'ño-la xita neí jè xi otíxoma ñánda jñò choòn; yaá kisikítsajna-ná ñánda tíhotíxoma Ki'ndí-la xi 'ño matsjakeè, ¹⁴jè xi kò jní-la tsibíchjtji-ná nga kisikítsajnandeí-ná t'ikoa kisijchàat'aà-ná jé-ná.

Jè Cristo tjina ítjòn-la ngats'iì xi tsejèn kò xi mikii tsejèn

¹⁵Ni saá jngoò xita beèxkon Nainá tanga jè Ki'ndí-la tsakó-la xita yá-ne xi Nainá. Nga jè Ki'ndí-la xi tjina ítjòn-la ngats'iì xi kisindaà isò'nde. ¹⁶Nga kò Cristo, Nainá tsibíndaà yije xi tjín ngajmii kò xi tjín i it'aà nangui, xi tsejèn kò xi mikii tsejèn, ngats'iì nga'ño xi tjín jiiin isén, xi títsajna ítjòn, xi otíxoma, xi xá ítjòn tjín-la, kò jña nga'ño xi mikii tsejèn-ná; it'aà ts'ee Cristo kisindaà yije-ne kò ts'e-né. ¹⁷Cristo, isaá kjótseé tjina mi k'oa-ne ngats'iì tsojmì xi tjín, kò jè tsjá-la nga'ño ngats'iì tsojmì mé-ne nga ndaà k'itsajna-ne. ¹⁸Jè Cristo tjina sko-la naxandá-la nga tijè-ne yijo-la kò it'aà ts'ee kjòts'ia-ne. K'e nga jaáya-la Cristo it'aà ts'e k'joabiyaà, jè tsibìjna ítjòn-la it'aà ts'e xita xi faáya-la mé-ne nga jè k'ijna ítjòn-la nita mé xi tjín. ¹⁹Nainá k'oaá s'ín kisaseèn-la nga jngoò k'aá ya tsibìjnajin yijo-la Cristo, ²⁰nga it'aà ts'ee Cristo, Nainá tsajoóndaàkò yije-ne ngats'iì xi tjín isò'nde kò xi tjín ngajmii; it'aà ts'e jní-la Jesucristo xi kixíxteèn ján it'aà krò, Nainá kisikijne 'nchán k'joa.

²¹Jñò, nga sa ítjòn, tìkoáá tìtsajnat'aàxìn-la Nainá; kondraá tsanguì-là ya ijìin inìma-nò, koií kjoa-la nga ch'o tjin kjoa xi ki'nè. ²²Tanga i'ndeí jyeé ndaà tsajoóko-nò Nainá koií kjoa-la jè kjo'in xi kisikjeín Cristo i it'aà nangui k'e nga k'en. Koií k'oas'ín kis'iìn-ne mé-ne nga tsjeè kìtsajnaà-nò, kò nímé jé xi s'e-nò kò nímé xi ch'o kítjõnguio nga nguixkon Nainá. ²³Kjoa koi mochjeén-né nga kixi tìtsajnakoo koni s'ín mokjeín-nò. Kò kì binchat'aàxìn-là kjoa xi tìtsachiñà-là it'aà ts'e 'én ndaà-la Nainá xi kjoa ts'e Cristo, 'én xi jye kina'yà-là. Jè 'én jè, xkì xi ján tìnokjoàyajìin-la xitá kóhokji isò'nde; kò 'an xi 'mì-na Pablo, 'aán kjòngatsja nga okòdya 'én.

Xá-la Pablo

²⁴I'ndeí matsjaá-na nga kjo'in tìsikjiaán xi kjoa tsajòn nga k'oaá s'ín tìsìjngoáà ijìin yijo-na koni s'ín chijat'aà-na kjo'in xi kitsjaà-na Cristo xi kjondaà ts'e naxandá-la nga tije-ne yijo-la. ²⁵Aán tìsìkjeén-na Nainá nga 'an tìsìxákoaa naxandá-la, xá xi kisìngatsja-na xi kjondaà tsajòn nga nguì ndaà kènojmiá 'én ndaà-la, ²⁶jè 'én xi tìjna'ma-la Nainá nga tisa tàts'en-la kjoa, tanga nàchrjein i'ndeí, Nainá jyeé tsakó-la xitá-la. ²⁷Jè Nainá k'oaá s'ín kjòmejèn-la nga tsakó-la jñà xitá-la kó s'ín tjin kjoa'ma-la xi 'ñó jeya tìjna xi kjondaà ts'e xi mìtsà xitá judío. Jè kjoa'ma, jè-né nga jè Cristo tìjnajiin inìma-nò jñò xi mìtsà xitá judío 'mì-nò, k'oaá ma-ne nga tìtsachiñà-là jñò kjoajeya-la Nainá xi tsjá-nò ján ngajmì.

²⁸K'oaá s'ín nokjoàyajìin-lajen ngats'iì xitá it'aà ts'e Cristo; 'ñó nokjoàko-jen nga nguì kò kjoachjine okòdya-lajen mé-ne nga ngats'iì xitá xi fit'aà-la Cristo nímé chijat'aà-la jè nàchrjein k'e nga ngajen sìngatsja-jen nga nguixkon Nainá. ²⁹K'oaá ma-ne nga 'ñó tìbínè-la yijo-na nga tìsìxá, tìsikjeén jè nga'ñó xi tsjá-na Cristo.

2 ¹Mejèn-na nga ndaà kàtasijìin-nò, nga 'ñó tikjaàn-tji-nò it'aà tsajòn kò jñà xitá-la Cristo xi tìtsajna ján naxandá Laodicea, kò it'aà ts'e ngats'iì xitá xi kj'èè kii beèxkon-na. ²Koií k'oas'ín tikjaàn-tji-nò mé-ne nga kàtas'e-la nga'ñó inìma-nò kò mé-ne nga jè kjotsjacha xi tjin-nò sìkìtsajnajtín-nò. Jè xi mejèn-na nga isa ndaà kòkixi kjohìtsjeèn-nò nga nguì ndaà kochiya-nò jè kjoa xi tji'ma-la

Nainá xi Na'è-ná. Jè kjoa'ma jè, jè-né Cristo. ³Nga ta jè Cristo tjín-la ngats'iì kjohítsjeèn kò kjoachjine xi 'nó chjí-la. ⁴Koií k'oa'sín tìxan-nò nga mì yá xi skónachan-nò nga sùkjeén 'én xi ndaà tsò tanga mìtsà 'én kixì. ⁵Nas'ín mìtsà ya tijnako-nò, tanga inima-na tìsikítsjeèn kjit'aà-nò. Matsjaá-na nga tì'be nga kixì tìtsajtiòn koni s'ín onguíkoo yijo-nò tìkoa kixì tìtsajnaà nga mokjeíin-nò it'aà ts'e Cristo.

Kjondaà xi tjín-ná nga Cristo tìtsajnaoá

⁶Koni s'ín kòkjeíin-nò it'aà ts'e Jesucristo xi otíxoma-nò, k'oaá tìs'ín kixì tìtjat'aà kjit'aà-là ⁷koni jngodò yá xi nanga fi ima-la kò koni jngodò ni'ya xi tìsindaàsòn-isa nga kàtakixiya jè kjoa xi mokjeíin-nò koni s'ín kichìta'ya; kò tjiì kjit'aà-là kjondaà Nainá.

⁸Tìkindaa yijo-nò nga mì jña skónachan-nò xita xi 'én ndiso chja xi ni mé chjí-la. Jña kjohítsjeèn koi, tà yaá nchrobá-ne it'aà ts'e xi taxki xita koni tsò kjotíxoma xi tjín isò'nde, mìtsà kjotíxoma ts'e Cristo.

⁹Yaá tijnajiin yijo-la Cristo yá-ne xi nguì jè sobà Nainá nga nimé chijat'aà-la. ¹⁰Nga Cristo tìtsajnakoo, tjín yije-nò nita mé xi mochjeén-nò. Jè Cristo otíxoma-la ngats'iì nga'nó kò kjotíxoma xi mìkiì tsejèn. ¹¹Tìkoaá it'aà ts'e Cristo kisit'aà chiba-nò kjoa ts'e circuncisión, tanga mìtsà jè xi tsja xita bít'aà chiba-la yijo-ná, jè-né nga jè Cristo tsibít'aà chiba-la inima-nò k'e nga jaàxìn jé xi tjín-la yijo jé-nò. ¹²Tìkoa k'e nga komà bautizar, k'oaá ngaya-la koni tsà ya kisìhijiin-t'aà-là Cristo xi kjoa ts'e jé-nò. K'oaá tìs'ín jaáya-nò koni s'ín jaáya-la Cristo koií kjoa-la nga mokjeíin-nò nga'nó xi tjín-la Nainá nga komà kiskímìitjen Cristo it'aà ts'e kjoa biyaà.

¹³Jñò, nga sa ítjòn, tìtsajnaà k'en-nò it'aà ts'e Nainá koi kjoa-la jé-nò nga jè Cristo kj'eè kii bít'aà chiba-la inima-nò nga faàxìn jé xi tjín-la yijo jé-nò. Tanga i'ndeì, Nainá jyeé kisikítsajnakon-nò kò Cristo nga kisìjchàat'aà-nò ngats'iì jé-nò. ¹⁴K'oaá ngaya-la koni tsà jye kisìkjeheya-ne xojon xi kitjámiì'nga xi kondrà tsaján. Jaàxìn-ne, yaá tshójnat'aà krò ñánda k'en-t'aà Cristo. ¹⁵Jña nga'nó xi tjín ijiin isén kò ngats'iì xi otíxoma, Nainá jaàxìn yije-la nga'nó-la. Yaá kisikijne-la k'e nga jè Cristo k'en-t'aà krò. Kò ngats'iì xita, yaá kijtseè nga kisichja.

Kjotíxoma-la xitá xi mì kiì fit'aà-la Cristo

¹⁶ K'oaá ma-ne jñò, kì kiì nìs'in-là xitá xi chjajno-nò nga tsò-nò nga mìkiì nìkitasòn kjoa ts'e tsojmì xi chine, xi 'yò, kjoa ts'e s'eí xi bitjo, kjoa ts'e nga otsejèn xitse ìjngòò k'a sá, kò ts'e nachrjein nìkjáya. ¹⁷ Ngats'iì kjoa koi, k'oaá ngaya-la koni tà 'nguién-laá kjoa xi iskan j'iì; tanga jè xi ngui kjoa kixì, jè Cristo. ¹⁸ Kì kiì bìl'nde nga faáxin-nò jè kjondaà xi jye titsajnajñòò jñà xitá xi beèxkón àkjale; k'oaá tsò-la yijo-la nga mìtsà xitá 'nga ikon. Jè xi mejèn-la nga jñò k'oa tìs'ín s'een. Jñà xitá koi tsò-né nga ìnga nijñá kis'enojmí-la kjoa jè, kò 'ñó 'nga síkítsajna yijo-la xi ta kjohítsjeèn ts'e, tanga nímé chjí-la. ¹⁹ Xitá koi mìtsà ya ndaà fit'aà-la Cristo. Nga jè Cristo tíjna sko-la naxandá-la kò jè tsjá-la kjohítsjeèn kò nga'ñó kò jè síkítsajnajtín xitá-la koni s'ín ma yijo-ná nga jñà naxá-ná bíteya nindaà-ná, mé-ne nga ndaà sìixá-ne naxandá-la Cristo koni s'ín mejèn-la Nainá.

²⁰ Jñò, tañáá k'en-koo Cristo, k'oaá ma-ne nga mìkiì tì tjí'nde-nò nga jñà sikitason kjotíxoma xi tjín isò'nde. ¿Mé-ne tákó k'oas'ín 'nè-nò koni tsà kjoa ts'e isò'nde otíxoma-nò nga nìkitasòn-nò kjotíxoma ²¹ xi tsò: “Kì kiì nìkoiì tsojmì koi, kì kiì chiniì, kì ndsejì nìkò-ne.”? ²² Jñà kjotíxoma koi, tà ts'ée tsojmì xi chija k'e nga tímochjeén. Tà kjotíxoma ts'e xitá-né koni s'ín okóya. ²³ Jñà kjotíxoma koi, k'oaá s'ín 'ya-la koni tsà tjín-la kjoachjine tanga mìtsà kixì kjoa. Nga síjé-ná nga ndaà sikitasoán kjoa xi 'in tjín mé-ne nga ndaà jchaxkoán kjotíxoma xi tjín-la ìngo; tìkooá tsò-né nga mochjeén nga mì xitá 'nga ikon komaá, kò nga kìnè-lá kjo'in yijo-ná. Tanga jñà kjoa koi nímé chjí-la, nga mìkiì ma osìkò-ná nga nìkítsajnaá jñà kjoa ch'o xi síjé yijo-ná.

3 ¹ Jñà kjoa tìnchátsjiod kjondaà xi tjín ngajmiì ya ñánda tíjna Cristo nga ya tíjnat'aà chrja kixì-la Nainá, koií kjoa-la nga ya jaáyakjod-nò kò Cristo, ² Koií tìkítsjeèn kjit'aà mé kjoa xi tjín ngajmiì, kì koií nìkítsjeèn kjoa xi tjín isò'nde. ³ Nga jñò, jyeé k'en kjoa ts'e isò'nde, kò jè kjoabinachon xitse xi tjín-nò nga ya titsajnakoo Cristo, yaá tíjnatjò nga nguixkòn Nainá. ⁴ Jè Cristo, jè-né xi kjoabinachon-nò; k'e nga jè xi kotsejèn ìjngòò k'a, jñò, tìkooá yaá kotsejèn-koo nga jeya kítsajnaá.

Xi kjoa jchínga ko xi kjoa xitse

⁵Tíkítsajna kjoa ch'o xi síjé yijo jé-nò xi kjoa ts'e isò'nde: koni jñà kjoa chijngui, ko kjoa tjé ko kjoa ch'o xi sasén-la yijo-nò ko ngats'iì kjoa ch'o xi fahajiìn-nò, ko nga kjìn tsojmì mejèn-nò. Kjoa jè tijé-ne koni tsà xkósòn yaxkón.

⁶Koí kjoa-la nga kjo'in tsjá-la Nainá jñà xita xi mikii 'nchréñijon-la. ⁷Jñò, tikoáá k'oaá tjin kjoa xi ki'nè kjòtsee k'e nga ya titsajnajñò kjoa xi ch'o tjin. ⁸Tanga i'ndeí tíkítsajna yije kjoa koi: jñà xi kjoa jti, ko jñà xi kjoa ts'en, ko jñà kjoa xi ch'o tjin, ko jñà kjoa xi nokjoàjno-la xita, ko jñà 'én xi ch'o tsò nga nokjoà. ⁹Ki 'én ndiso nokjoàkoo xinguiòo nga jyeé kichjaàxìn-là yijo-nò kjoa jchínga-nò ko ngats'iì kjoa xi ki'nè nga sa kjòtsee. ¹⁰Jyeé kichjoé xi kjoa xitse. Jyeé jahatjya-la kjohítsjeèn-nò. K'oaá s'ín tímaxitseya koni kji isén-la Nainá xi tsibíndaà-nò skanda kóni nga isa ndaà jchaxkoòn yá-ne xi Nainá. ¹¹I'ndeí, mì tì kiì 'ñó mochjeén-ne yá-né xi xita griego, o yá-né xi xita judío, yá-né xi tjit'aà chiba-la, o yá-né xi kjoa ts'e circuncisión, yá-né xi xita xìn nangui-la ko yá xita-ne xi ima tímajchá, yá-né xi chi'nda tijná'ñó, o yá-né xi tijnandeí. Jè Cristo xi isa 'ñó chjí-la; ko jè xi tijnajiìn inima-la ngats'iì xita-la.

¹²Jñò xi xó k'oa'sín jaàjiìn-nò Nainá ko xi nguì xita tsjeè-la maà nga ndaà matsjakeè-nò, k'oaá s'ín chjoé xi kjoa xitse nga kàtahimacha xita; kàtas'e-nò kjondaà; kì 'nga matakòn; indaàkjoa t'een; ko kàtas'e-la kjoatsejta inima-nò. ¹³Nita mé kjoa xi tjin-nò tikjeiìn-là xinguiòo, tijchàat'aà-là xinguiòo tsà mé kjoa xi ch'o síko-nò. Jñò, k'oaá tis'ín t'een, koni s'ín kisiko-nò Cristo nga kisijchàat'aà-nò. ¹⁴Jè xi tijná ítjòn ts'e kjoa koi, jè-né nga titsjacha xinguiòo, nga jè kjoatjòcha xi ndaà síkítsajnajtín-ná. ¹⁵Kjoa'nchán-la Cristo ndaà kàtatíxoma ijiìn inima-nò; nga Nainá xó k'oaá s'ín kiìchja-nò nga 'nchán kítsajnakoo xinguiòo mé-ne nga ta jngòò yijo koma-nò. Ko mochjeén-né nga kjit'aà nachrjein tjii-là kjondaà Nainá.

¹⁶Jè 'én-la Cristo 'ñó ndaà kàtasijiìn kjit'aà ya ijiìn inima-nò. Takóya-la xinguiòo ko tikixiyaà nga tikjeén kjohítsjeèn xi tjin-la kjoachjine. Tijndá-là Nainá nga tjii-là kjondaà xi tjiìn inima-nò; tijndá-là sò ts'e salmo, ko sò xi jeya síkijna Nainá,

kò sò xi ya nchrobá-ne ya jjiin inima-nò. ¹⁷Ngats'iì 'én xi nokjoà kò ngats'iì xá xi 'nè, it'aà ts'e Jesucristo xi otíxoma-ná koat'een. Kò it'aà ts'e Jesucristo tjiì-là kjondaà Nainá xi Na'èn-ná.

Kjoa xi mochjeén nga sikitason xita-la Cristo

¹⁸Jñò íchjín xi x'in tjin-nò, nangui titsajna-là x'in-nò koni s'ín ok'in-la jña xita-la Cristo. ¹⁹Jñò xi íchjín tjin-nò, tjòcha jchaa íchjín-nò, kì toòn 'yaà.

²⁰Jñò xi ixti 'mì-nò, ndaà tiná'yañijon-là xita jchinga-nò, nga jè Nainá ndaà sasén-la kjoa koi. ²¹Jñò xi Na'èn 'mì-nò, kì taxki sii nokjoàkoo ixti-nò mé-ne nga mì sikàjeèn-la ikon.

²²Jñò xi chi'nda maà, ndaà tikitasòn yije-là nei-nò i it'aà nangui; kì tà k'ée nixá k'e nga tíkotsejèn-nò nga ta jè xi mejèn-nò nga ndaà kitsajnakoo. Nguì koó inima-nò nga tikitasòn-là koií kjoa-la nga yaxkón Nainá. ²³Nita mé kjoa xi s'een, nguì koó inima-nò nga t'een koni tsà it'aà ts'e Na'èn-ná titsanikitasòn kò mìtsà it'aà ts'e xi taxki xita. ²⁴Jyeé 'yaà nga jè Na'èn-ná Jesucristo tsjá-nò chjí-nò nga tjoé-nò jè kjotjò xi tsjá-nò Nainá nga ixti-la maà koi kjoa-la nga jè titsanixát'aà-là Jesucristo xi otíxoma-nò. ²⁵Tanga jè xi ch'o tjin kjoa xi s'ín, k'oaá s'ín kochjí-la koni tjin kjoa ch'o xi s'ín. Nainá mìtsà faájiin xita, ngásòn ngáya fiko ngats'iì.

4 ¹Jñò xi nei-la xá ma, ndaà tikoo jña xita chi'nda-nò koni s'ín tjin xi kjoa kixi, nga jñò 'yaà-nò nga tikoa tjin jngodò-nò xi Nei-nò ma ján ngajmiì.

²Kì bikjoàn-là nga nokjoàt'aà-là Nainá; kjit'aà nachrjein titsajnandaà nga tinókjoat'aà-là kò tjiì-là kjondaà Nainá.

³K'oaá tis'ín titsi'batji-nájen, mé-ne jè Na'èn-ná kàtatsjá'nde nga koma kénojmi-jen 'én-la Cristo xi tji'ma-la Nainá nga sa ítjòn; nga koií kjoa-la nga ndayá tjnnaa'ya. ⁴Titsi'batji-ná mé-ne nga s'e-na nga'ńó nga ndaà kixi kichjàjiin-la xita koni s'ín tjinè-la nga kichjà.

⁵Jñò, ndaà tikjeén kjohítsjeèn-nò mé-ne nga ndaà kitsajnakoo jña xita xi mìkii beèxkon 'én ndaà-la Nainá xi kjoa ts'e Cristo. Ndaà tikjeén nachrjein xi tí'biì-nò nga kos'ín tikitasòn. ⁶K'e nga chikoo xita, jña 'én tinókjoaa xi ndaà tsò kò xi ndaà sasén-la mé-ne nga koma sikátji-là 'én xi skonangui-nò.

Kó tsò Pablo nga síhixat'aà x̄it̄a

⁷Ngats'iì kjoa xi tímat'ian, jè keènoj̄mí yije-nò jè 'ndseé Tíquico xi 'an 'ñó ndaà matsjake nga jè ndaà síchját'aà-na koa ndaà nìxákjòd-lajen Nainá. ⁸Koií xá tìsikasén-nò nga keènoj̄mí-nò xi it'aà tsajen kós'ín tìtsajna-jen kò mé-ne nga kàtatsjá-nò nga'ñó ts'e inìma-nò. ⁹Tìkooá ya tíbáhihtako Onésimo xi x̄it̄a tsajòn, xi 'ndsè ma it'aà ts'e Cristo. Nga x̄it̄a kixi-né kò 'ñó matsjacha-jen. Jñà keènoj̄mí-nò mé kjoa xi tíma ijndé.

¹⁰Jè Aristarco xi taña tìtsajna-jen ndayá, tísíhixat'aà-nò. Kò jè Marcos xi ti xíkjin ma Bernabé tìkooá tísíhixat'aà-nò. Jyee kis'enoj̄mí-nò it'aà ts'e Marcos; tsà ya kijchòkon-nò, t'een kjondaà ndaà chjoétjò. ¹¹Tìkooá tísíhixat'aà-nò Jesús xi tìkoa Justo 'mì. Tà jñà-né xi x̄it̄a judío xi mokjeín-la xi k'oas'ín 'ñó ndaà nchisíxako-na it'aà ts'e kjetíxoma-la Nainá kò 'ñó ndaà síjehikon-na. ¹²Epafras, xi chi'nda-la Cristo, tìkooá tísíhixat'aà-nò nga x̄it̄a tsajòn-nò. Kjit'aà nachrjein bìtsi'batjì-nò mé-ne nga nguì kixi kìtsajnaà koa ndaà kìtsajnaandaà nga síkitasòn mé xi mejèn-la Nainá. ¹³'An, ndaà tìbe nga jè Epafras 'ñó síkájno xi it'aà tsajòn kò it'aà ts'e x̄it̄a xi tìtsajna ján naxandá Laodicea kò xi tìtsajna ján naxandá Hierápolis. ¹⁴Tísíhixat'aà-nò Lucas jè xi chjìnexkii xi 'ñó matsjacha-jen, tìkoa tísíhixat'aà-nò jè Demas.

¹⁵Xi it'aà ts'an tìixat'aà-ná jñà 'ndseé xi tìtsajna ján naxandá Laodicea, kò jè chjoón tichjaá Ninfa, kò ngats'iì x̄it̄a naxandá-la Cristo xi ya bixoña ni'ya-la. ¹⁶K'e nga jye kíxkejiin-là xinguioo xojon jè, tìkooá kàtaxkejiin-la naxandá-la Cristo xi tìtsajna ján Laodicea; koa jè xojon xi ts'e Laodicea tìkooá tìxkejñòd. ¹⁷Koatìn-la jè Arquipo: kàtasíkitasòn xá xi kitsjaà-la Cristo.

¹⁸Nga jye tífèhet'aà xojon jè, koó ndsaa tikjiì-nò 'an xi 'mì-na Pablo, nga tìsìhixat'aà-nò. Tìkítsjeèn nga ndayá tìjña'ya. Jè kàtijnako-nò kjondaà-la Nainá. K'oa s'ín kàtama.